

# YAMESI

## Pepa Yamesi iŋgere panzi kalo-tawana tamâta

Yamesi nde Yesu tai (Matai 13:55, Galesia 1:19), aku imo poe tamâta panzi kalo-tawana tamâta simo Jerusalem lawea (Pâri Tamâta 12:17, 21:17-18). Iŋgere ŋgua ŋine ilâ panzi Juda tamâta ŋinde kalonzi tawana Yesu Kirisi ŋineŋga sikai nâna ŋana, kala sikâwa pwapwataki silâ kala simo piti piti lâ tâno pinde. Yamesi itula ŋgua arara ŋana vetâŋa pinde kindai kalo-tawana tamâta ma tapaveta kuku. Iporo tu ambo nenda kalo-tawana ŋandai igagati kindai ŋana taveta vetâŋa ara pinde ŋga, ande nenda kalo-tawana nde mao tia. Kinda ma tapakatona kawânda ŋgua sondo ndo, ku ma tapatawa tininda ku takai noŋa pa Maro ŋJalae.

**1** <sup>1</sup>Naŋa Yamesi, naŋa amo Maro Kindeni kuku Yesu Kirisi rua nenzi wurâta tamâta. Naŋa aŋgere ŋgua lâ pepa ŋine tini imâ pa miki kalo-tawana tamâta lâ Isrel ŋgu saŋao kananŋomi rua, miki ŋinde kala muŋga kapile nemi lawea tina, aku kalâ kamo pwapwataki lâ tâno pinde. Naŋa aporo kari ara pa miki rârâni.

### **Malia kie-kie uru isuka kindai ŋana tamandi kaika kâ**

<sup>2</sup>Niŋgu-nambwe wukale, ambo malia kie-kie ma ipâŋga pa miki ŋana ikai samâŋa pami, ande ara ŋana miki ma kaporo ŋgua lâ warakami ilomi mine tu, “Naŋa ma andeka pâta.” <sup>3</sup>Miki kasama tu ambo vetâŋa tonŋe ma ipâŋga ŋana ikai samâŋa pa nemi kalo-tawana kâ, ande vetâŋani ndaina isukami ŋana kamandi kaika ku kakale malia ndia rârâni. <sup>4</sup>Aku ara ŋana miki ma kamandi kaika mine nâ ku kakale nemi malia ikura zo rârâni. Ambo nemi kalo-tawana ma ikeno kaika mine ku imo nâ, ande miki ma kamo kalo-tawana tamâta sondo ndo, ikura Maro Kindeni ne pateâŋa mine, aku miki ma kakura ndo ŋana kapono muli papa i.

### **Ambo tamâta tonŋe iroto ŋana ilo-kalo ara kâ, ande ara ŋana i ma ikai noŋa pa Maro Kindeni nâ**

<sup>5</sup>Ambo tamâta tonŋe lâ miki ŋginimi iroto ŋana ilo-kalo ara kâ, ande ara ŋana i ma ikai noŋa pa Maro Kindeni tu ma ilo-kalo ilua i. Ambo

tamâta ñinde iveta mine, ande Maro Kindeni ma ipaloŋo pa i ne noŋa. Ñana tu Maro Kindeni uru kelekele arara kie-kie ilanzi tamâta rârâni, aku i ñandai tini pwâka ñananzi ku imbitanzi ñana nenzi noŋa ŋga. <sup>6</sup>Taitu ara ñana tamâta ñinde ma kalo tawana kaika muŋga lâ ŋga, ñineŋga ikai noŋa pa Maro Kindeni. Ambo tu i ilo rua-rua kala iporo pa tamwata mine tu, “Tiambo Maro Kindeni ma ipaloŋo pa nanenŋu noŋa ku ilo-kalo ara ilua naŋa, tiya?”, ande ŋgua kaŋa mine nde ara tia. Tamâta ea ilo rua-rua mine, ande i itogo tâi ne kâla ñinde lawea ikai kâki ku imbwa potomule mine. <sup>7</sup>Ambo tamâta mine itu Maro Ñalae ma sâ toŋge ilua i, ande i ne ilo-kalo ñinde nde soki ndo, <sup>8</sup>ñana tu i nde tamâta ñana ilo rua-rua kâ. Mine kala i ne vetâŋa rârâni ikeno sondo tia ndo.

**Yamesi itula ŋgua panzi sugorai tamwatanzi wa kinzi mbaliŋa warakanzi wa**

<sup>9</sup>Ambo kalo-tawana tamâta toŋge imo sugorai, i ne kelekele rârâ tia, ande ara ñana i ma indeka nâ, ñana tu Maro Kindeni isuka i kâki. <sup>10</sup>Ambo kalo-tawana tamâta toŋge imo itogo mbaliŋa warika mine, ande ara ñana i ma indeka lâ zo ndia i ipâŋga sugorai tamâta, ñana tu tamâta ea kinzi ilonzi ñalae koŋa tu sigona tâno ne mbaliŋa rârâ, ande kinzi ñinde nenzi via ma muli marumbu lâ, itogo unza ne mâle mine. <sup>11</sup>Kinda tasama tu lâ zo ñana kari ikâki kâ, ande kari uru iveta nia nâna ndo, aku ikana unza ŋgâla-ŋgâla ndo lâ. Ñineŋga unza ne mâle siyauru sindue, aku ne siŋgâra ara marumbu ndo. Aku mine nâ, kinzi mbaliŋa warakanzi ma siveta nenzi wurâta lee, ñineŋga walele nâ nenzi via ma marumbu lâ.

**Maro Kindeni ilaŋe kinda ñana taveta kiesaka kâ, ande tia ndo**

<sup>12</sup>Tamâta ea uru imandi kaika ku ikale malia ikura zo rârâni, ande i ikura tu indeka. Ambo i ma ipole samâŋa ñinde rârâni, aku ne kalo-tawana imbe tia, ande Maro Kindeni ma via mao ilua i itogo ne kulu mine, aku ma imo ara mine ku imo nâ. Muŋgani Maro Kindeni ipa ŋgua tu ma via mao ilanzi tamâta rârâni ñinde ilonzi ndo keno pa i.

<sup>13</sup>Ambo kelekele toŋge ma igagati tamâta toŋge ilo ku ilaŋe i ñana iveta kiesaka kâ, ande i ma iporo mine tu, “Maro Kindeni ilaŋe naŋa kala aveta kiesaka”, mine ndimo. Ñana tu kiesaka toŋge ikura tu ilaŋe Maro Kindeni tia ndo, aku Maro Kindeni ilaŋenzi tamâta ñana siveta kiesaka kâ, ande tia ndo kanaŋo. <sup>14</sup>Taitu kinda tamâta warakânda taitu-taitu ilonda uru igagati kinda ku ilaŋe kinda ñana taveta kiesaka kâ. Ilo-kalo sakamao uru iveta mona-mona pa kinda, aku ñinde iveta ilonda kâki ñana taveta kiesaka kâ. <sup>15</sup>Ñineŋga ilo-kalo sakamao ñinde ipulia kiesaka ipâŋga lâ ilonda kalonda, itogo taine ipagugua natu mine. Aku muli ŋga kiesaka ma itumbu ñalae, ande ma ipagugua matera lâ ilonda kalonda.

<sup>16</sup>Ñiŋgu-nambwe wukale, naŋa ilonŋu ndo keno pami. Miki ma ilomi kalomi soki-soki ku kapalâŋe warakami ndimo. <sup>17</sup>Kelekele ara ndia kinda

takai, ande Tamânda imo samba ilo io kelekele ñinde ndoni indue imâ pa kinda. Inani muñga ipulianzi samba ne sinâla ndoni, aku i ma ilele tamwata ne vetâña, ande tia. Kari uru ikâki ipane nia lee indue, ñineñga nia ñaña lâ; andeta Maro Kindeni ipalele mine tia ndo. <sup>18</sup>Nanayoni i ilo patewa tu ne ñgua mao ma ipulia via ipâñga lâ ilonda. I ilo tu kinda ma tamuñga panzi tamâta ñgu rârâni wa kelekele ndia rârâni i muñga ipulianzi sipâñga ñinde, tatogo kâpwa wasaseki ipâñga muñgâña lâ tâno ilo mwasina.

**Ambo kinda tañânda nâ taloño Maro Kindeni  
kawa ñgua, ande ñinde nde ara tia**

<sup>19</sup>Ñingu-nambwe wukale, naña ilonngu ndo keno pami. Miki kalomi ñgere sondo ñana ñine kâ; ara ñana miki rârâni taitu-taitu ma katambira tañami walele nâ ñana kaloño Maro Kindeni kawa ñgua. Taitu miki ma kaporo katula ñgua walele ndimo, aku ma wisimi nâna walele ndimo. <sup>20</sup>Ñana tu Maro Kindeni ilo tu kinda ma taveta vetâña ara lâ i nao, andeta kinda tamâta nenda wisi-nâna ñandai isuka kinda ñana taveta mine ñga. <sup>21</sup>Mine nde ara ñana miki ma kapile vetâña ndia uru iveta ilomi muso, aku kapile vetâña sakamao rârâni ñinde kala ipâñga ñalae lâ tâno kulu. Ara ñana miki ma kapatawa warakami tinimi ku kapono muli sondo pa Maro Kindeni kawa ñgua, ñgua ñinde i uru io lâ ilomi kalomi. Ñana tu ñgua ñinde ikura tu iyautemi piti lâ kondoma ilo ku via mao ilami.

<sup>22</sup>Miki ma kaloño Maro Kindeni kawa ñgua ñinde lâ tañami nâ ndimo. Ambo miki ma kaloño kaa nâ, ande miki ma kapalâñe warakami. Ara ñana miki ma kapaveta kuku ñgua ñinde ku koka muli. <sup>23</sup>Ambo tamâta tonge ilonño Maro Kindeni kawa ñgua, andeta ilonño kaa nâ kala ipaveta kuku tia, ande tamâta ñinde itogo tamâta imora tamwata nao lâ nduñgu ilo. <sup>24</sup>I imora tamwata nao lâ, ñineñga iyoka ilâ, aku walele nâ i kalo kapa tu i nao kilala mana. <sup>25</sup>Taitu Yesu Kirisi ne ñgua tukuña sondo ñinde imbware kiesaka ne kaika ku iveta kinda tamo soo nâ. Mine kala tamâta ea uru kalo ñgere sondo ñana Maro Kindeni kawa ñgua ku ipaveta kuku, ambo i ma kalo kapa ñana tia, ande Maro Kindeni ne nzâmbe ma ikeno pa tamâta ñinde ne wurâta tava ne vetâña rârâni.

<sup>26</sup>Ambo tamâta tonge ilo mine tu, “Naña nde kalo-tawana tamâta ara”, andeta i ñandai ikatona tamwata kawa ñgua sondo ñga, ande tamâta ñinde ikai lañeña pa tamwata, aku ne kalo-tawana nde kelekele kaa nâ. <sup>27</sup>Ambo tamâta tonge ne kalo-tawana ikeno sondo ndo lâ Maro Kindeni nao, ne soki tonge tia, ande tamâta ñinde ma uru iveta mine; i ma ilo ñananzi lâlu mundoro wa kinzi taine mwala-mwala wa, ku ma isukanzi ñana nenzi malia kie-kie kâ. Andeta ñinde nâ tia; i ma ipakatona tamwata sondo tona, ñana tâno ñine ne vetâña potomule ma ikura tu iveta i ilo muso lâ Maro Kindeni nao, ande ma tia.

**Ara ŋana kinda ma taveta vetâna kie taitu nâ panzi tamâta rârâni**

**2** <sup>1</sup>Ningu-nambwe wukale, Maro Kindeni kilala ipânga nia yo lâ nenda Maro Yesu Kirisi tini, aku nemi kalo-tawana ikeno pa i. Mine nde miki ma kaveta kemi ara panzi mbaliŋa warakanzi, aŋga kapu mulimi panzi sugorai tamwatanzi, mine ndimo. <sup>2</sup>Ambo tamâta rua ma soka lombo simâ nemi luma ŋana pasauŋa kâ ilo ŋana sipanea Maro Kindeni kâ, aku tamâta tonŋe lâ kinzi rua ipasawa pasawaŋa ara ndo ku io singâra “gol” lâ mbau sili, aŋga tamâta tonŋe nde imo sugorai, ne pasawaŋa ara tia; <sup>3</sup>ambo miki ma kaveta kie ara papa tamâta ŋinde, i ne pasawaŋa ara, aku kano tu, “Noko kumâ kusaŋona saŋonâna nia ara ŋine”, andeta miki ma kaveta maŋeti pa sugorai tamâta ŋinde ku kapai tu, “Noko kulâ kumandi lâ nia ŋgaŋe ndai”, tâku, “Kusaŋona tâno kulu lâ naŋa keŋgu tini laiti”; <sup>4</sup>ambo miki ma kaveta vetâna kie mine, ande ŋinde itogo miki kapateanzi tamâta simo piti-piti ikura warakami nâ nemi ilo-kalo soki-soki. Aku ŋinde itogo miki kapânga katogonzi ŋgua-samâna tamâta ŋinde simo tava ilo-kalo sakamao nâ.

<sup>5</sup>Ningu-nambwe wukale, naŋa ilonŋu ndo keno pami. Miki kaloŋo ŋga; Maro Kindeni ilo panzi tamâta ea simo sugorai lâ tâno tamâta naonzi, aku nanayoni ipatea tu nenzi kalo-tawana ma ipânga ŋalae ndo. Aku ipatea tu ma ikai maro panzi tona, kala ma simo i ne ŋgu. Muŋgani i ipa ŋgua tu ma ikai maro mine nâ panzi tamâta ea ilonzi ndo keno pa i. <sup>6</sup>Aŋga miki uru kaveta maŋeti panzi sugorai tamwatanzi. Opopo, kalomi ŋgere sondo ŋga; ea kinzi uru sitawa miki ndue ku sio malia kâki lâ kulumi, a? Aku ea kinzi uru sikaimi kalâ pa ŋgua nia, a? Kinzi mbaliŋa warakanzi nâ siveta kenzi mine pami! <sup>7</sup>Yesu Kirisi ŋa ikeno miki tinimi, andeta kinzi mbaliŋa warakanzi nâ uru siporo ŋgua pavaligiŋa pa Yesu ne ŋoa ara ŋinde.

<sup>8</sup>Kinda nenda koipu ŋalae Maro Kindeni ne tukuŋa ikeno lâ pepa tini mine tu, “Noko ma tini mwasa panzi tini pinde itogo noko tini mwasa pa tamwata mine”. Ambo miki ma kapaveta kuku ŋgua tukuŋa ŋinde, ande ŋinde ma ara ndo. <sup>9</sup>Taitu miki kaloŋo ŋga; ambo miki ma kaveta kemi ara panzi mbaliŋa warakanzi, andeta ma kapu mulimi panzi sugorai tamwatanzi, ande miki kaveta kiesaka, aku ŋgua tukuŋa itula kilalami pwataki tu miki nde tamâta ŋana kapu ŋgua tukuŋa ututu. <sup>10</sup>Ambo tamâta tonŋe uru ipono muli pa ŋgua tukuŋa rârâni, andeta ipu ŋgua tukuŋa taitu nâ utu, ande ŋinde itogo ilaŋa ipole ŋgua tukuŋa rârâni. <sup>11</sup>Kinda tasama tu Maro Kindeni itula tukuŋa tonŋe pwataki mine tu, “Noko ma kuveta sakamao kuku tamâta tonŋe kaiwa ndimo”. Aku ina kala itula tukuŋa tonŋe pwataki mine tu, “Noko ma kupu tamâta pâta imâte ndimo”. Mine kala, ambo noko kupono muli pa ŋgua tukuŋa ŋana pakâeŋa kâ, andeta kupu tamâta tonŋe pâta imâte, ande noko kupânga tamâta ŋana kulaŋa kupole ŋgua tukuŋa kâ.

<sup>12</sup>Miki kalomi ngere sondo nana nina kâ; Yesu Kirisi ne ngua tukuŋa nana tini-mwasa kâ imbware kiesaka ne kaika ku iveta kinda tamo soo nâ, aku Maro Kindeni ma ilea pa tukuŋa ndainani nâ lâ zo ninde kinda ma tamandi lâ i ne ngua nia. Mine nde ara nana miki ma kaporo wa kaveta ikura tukuŋa ninde kilala mine. <sup>13</sup>Nana tu lâ zo nana Maro Kindeni ma ipare nia panzi tamâta kâ, tamâta ea muŋga nandai kalo sukâŋa nananzi i tini pinde, ande Maro Kindeni ma kalo sukâŋa nana tamâta ninde, ande tia. Mâsi nana kalo-sukâŋa kâ nde njalae ndo, ipole pareŋa-nia ne mâsi.

### Nenda vetâŋa itula nenda kalo-tawana kilala pwataki

<sup>14</sup>Niŋgu-nambwe wukale, ambo tamâta tonje iporo tu, “Nana kalonju tawana Yesu Kirisi”, andeta i nandai iveta vetâŋa ara pinde nga, ande tamâta ninde ne kalo-tawana nde kelekele kaa nâ. Tiambo kalo-tawana kie mine ikura nana iyaute tamâta ninde piti lâ kondoma ilo ku via mao ilua i, tiya? Tia ndo! <sup>15</sup>Ambo kalo-tawana tamâta tonje i ne lalava ara tonje tia, aku i kâ kaniŋa kala keno tia, <sup>16</sup>ambo tamâta tonje lâ miki nginimi ipai tu, “Maro imo kuno! Noko kulâ, aku kupita lalava ara lâ tini wa kuka kaniŋa nana ma kapwa pupuro kâ”; ambo tamâta ninde ma iporo ngua kaŋa mine, andeta i tamwata tini pwâka nana isuka sugorai tamâta ninde nana lalava wa kâpwa wa, ande i ne ngua ma isuka tamâta ninde mâsi mana, a? Tia ndo! <sup>17</sup>Aku nenda kalo-tawana kilala kala ikeno mine nâ. Ambo tamâta tonje ne kalo-tawana nandai igagati i nana iveta vetâŋa ara pinde kâ, ande ninde itogo i ne kalo-tawana nde imâte lâ.

<sup>18</sup>Tamâta pinde uru siporo pa nawalanzi tu, “Noko kalo tawana Maro Kindeni, anga nana uru aveta vetâŋa ara pinde”. Taitu nana ilonju tu atu ngua lâ kawanzi mine tu, “Ambo noko kalo tawana Maro Kindeni, andeta noko nandai uru kuveta vetâŋa ara pinde, ande nana ma akura tu asama noko ne kalo-tawana ninde kilala pwataki mâsi mana, a? Ambo taitu nana warakâŋgu ma aveta vetâŋa ara pinde, aku nina ma itula pwataki pa noko tu nanenju kalo tawana nde mao nâ. <sup>19</sup>Noko uru kutula ne kalo-tawana pwataki mine tu, ‘Maro Kindeni simbo nâ nde Maro mao’, aku ngua ninde nde ara ndo. Andeta kuloŋo nga; kinzi koroani saka kala uru kalonzi tawana mine nâ, aku nina iveta kinzi siruru pâta kanaŋo!

<sup>20</sup>Noko kulu kâmba tia ndo! Ambo noko ne kalo-tawana nandai igagatino nana kuveta vetâŋa ara pinde kâ, ande noko ne kalo-tawana nde kelekele kaa nâ.” Kala nina nana ma atula ngua nina ne duvi pwataki. <sup>21</sup>Muŋga, kinda timbunda Abraham io i natu Isaka kâki mira kulu nana ipu pâta imâte ku ilua Maro Kindeni itogo patarawâŋa mine. Lâ zo ninde, Maro Kindeni ilo ara ndo nana Abraham ne kalo-tawana kâ, aku imora Abraham tu i tamâta nana ilo mbâra-mbâra kâ. <sup>22</sup>Miki kalomi ngere sondo nga. Abraham ne kalo-tawana nde ilâ taitu kuku i ne vetâŋa,

aku i ne vetâŋa nde iveta ne kalo-tawana ipâŋga mao. <sup>23</sup>Mine kala Maro Kindeni kawa ŋgua ipâŋga kanaŋo. I ne ŋgua ikeno lâ pepa tini mine tu,  
 “Abraham io ne kalo-tawana ilâ pa Maro Kindeni, aku ŋana duvi  
 ŋinde kâ ipâŋga ilo mbâra-mbâra lâ Maro Kindeni nao.”

Aku muli ŋga Maro Kindeni iporo ŋgua ŋana Abraham mine tu,  
 “Abraham nde imo naŋa niŋgu-nambwe.” <sup>24</sup>Kala ŋine ŋga miki kasama  
 tu kalo-tawana laŋeŋa ikura ŋana iveta tamâta tonŋe ipâŋga ilo mbâra-  
 mbâra lâ Maro Kindeni nao, ande tia. Kalo-tawana mao uru ipulia vetâŋa  
 ara pinde, aku kalo-tawana kie mine nâ ikura ŋana iveta tamâta ipâŋga  
 ilo mbâra-mbâra lâ Maro Kindeni nao.

<sup>25</sup>Muŋga, nzâla taine tonŋe imo, i ŋa mine Rahap. Kinda timbunda  
 Yosua ionzi zugu tamâta rua soka paveâŋa nâ silâ pa Rahap ne lawea,  
 ŋana sisama kazâŋa tamâta ŋinde nenzi kaika, aku Rahap iveta kie ara  
 panzi. Ivezani lâ ne luma ilo lee, ŋineŋga ionzi soka ara lâ nzâla tonŋe  
 siŋgeŋge ŋana kazâŋa kâ ku sitaulo kilo. Maro Kindeni imora Rahap  
 ne vetâŋa ara ŋinde, ande kala iveta i ipâŋga ilo mbâra-mbâra lâ i nao.  
<sup>26</sup>Kinda tasama tu ambo koroani ipile tamâta tonŋe karae, ande tamâta  
 ŋinde nde imâte lâ. Aku mine nâ, ambo tamâta tonŋe ne kalo-tawana  
 ŋandai igagati i ŋana iveta vetâŋa ara pinde, ande ŋinde itogo i ne kalo-  
 tawana nde imâte lâ.

### Kinda ma tapakatona sondo ŋana kawânda ŋgua kâ

**3** <sup>1</sup>Niŋgu-nambwe wukale, ambo tamâta rârà lâ miki ŋginimi situ  
 sikai wurâta ŋana sipanananzi tamâta ŋana Maro Kindeni kawa  
 ŋgua kâ, ande ŋinde ara koŋa tia. Nanenŋu ŋgua ŋinde nde duvi mine; lâ  
 zo ŋana kinda tamâta râràni ma tamandi lâ Maro Kindeni ne ŋgua nia,  
 ande i ma io mata ilea kaika pa maka pananâŋa tamâta nema vetâŋa.

<sup>2</sup>Kinda râràni taitu-taitu uru taveta vetâŋa potomule pinde. Andeta miki  
 kaloŋo ŋga; ambo kalo-tawana tamâta tonŋe ma iporo ŋgua ara nâ, ande  
 tamâta mine ma imo tamâta sondo ndo, aku ma ikura ŋana ipakatona  
 tamwata tini ndoni sondo.

<sup>3</sup>Kinda uru tao “aini” mbuku pinde lâ hosi kawanzi ilo, ŋana iveta  
 kinzi silâ ikura ilonda papa mine. Ambo takatona kinzi hosi kawanzi  
 mine, ande kinda takura tu takai poe pa tininzi ndoni. <sup>4</sup>Aku miki kalomi  
 ŋgere ŋana wâŋga ŋalaŋala nenzi vetâŋa kâ tava. Wâŋga nde kelekele  
 ŋalae tina, aku lawea uru iyoka more-more ŋalae ku izuzuŋa wâŋga  
 ikâwa tâi kulu ilâ. Aŋga wâŋga ne poe nde kelekele kiri-mwata nâ.

Andeta kalomi ŋgere ŋana ŋine kâ; ambo wâŋga warika itambulilia poe  
 kiri-mwata ŋinde, ande wâŋga ma nao sori lâ, ku ma ilâ papa nia ndia  
 wâŋga warika itu ilâ papa. <sup>5</sup>Aku mine nâ, kinda kawânda nde karaenda  
 ne pinde-pinde kiri-mwata nâ. Taitu i uru ipasuka tamwata tini kâki ndo.  
 Aku kalomi ŋgere ŋana yââ tona. Yââ tini-mwata nâ ikura tu igagati yââ

ɲalae tina ku ikananzi kâi rârâni lâ dugu ilo. <sup>6</sup>Aku kinda kawânda kala itogo yâa mwasina. I nde karaenda ne pinde-pinde taitu nâ, ambo taitu i uru ipulia vetâɲa sakamao kie-kie rârâ. I uru iveta karaenda ndoni ipâɲga muso, aku iveta nenda vetâɲa ndoni ipâɲga soki-soki, itogo yâa ikana kelekele ndoni mine. Aku yâa ɲinde nde iyoka pa yâa ɲalae ne mbâa ilo kala imâ kawânda ilo.

<sup>7</sup>Kinda tamâta takura ɲana takai poe panzi simbi ɲgoi kie-kie, kinzi sii wa mwâta wa kelekele rârâni uru simo tâi ilo wa. Mao nâ, kinda taveta kinzi simbi ɲgoi rârâni simo kalonda marumbu lâ. <sup>8</sup>Taitu tamâta tonɲe ikura ɲana ikai poe sondo pa tamwata kawa, ande tia ndo. Ikura zo rârâni, kinda kawânda pakâe ku taporo ɲgua sakamao. Kinda kawânda nde itogo mwâta saka mwasina, aku ɲinde itogo kawânda ikura ɲana ipu tamâta pâta imâte.

<sup>9</sup>Kinda kawânda taporo ɲgua pinde ɲana tapanea nenda Maro ɲalae kâ, ina kinda Tamânda. Andeta taporo ɲgua sakamao pinde ɲana tayaulanzi tamâta kâ tona, kinzi ɲinde Maro Kindeni muɲga io tamwata kilala lâ tininzi. <sup>10</sup>Kinda kawânda nde kelekele taitu nâ, andeta ɲgua kaɲa rua uru ipâɲga lâ kawânda ilo. Paneâɲa ne ɲgua uru ipagema kuku ɲgua sakamao. Niɲgu-nambwe wukale, vetâɲa mine nde ara tia ndo. <sup>11</sup>Lâa ara ne keve tonɲe ikura tu ipulia tâi tava, ande tia. <sup>12</sup>Niɲgu-nambwe wukale, kâi mbimu ikura ɲana ipulia mbimu kanaɲo, ande tia, aɲga kâi wâwâe ikura ɲana ipulia mbimu kanaɲo, ande tia. Aku mine nâ, tâi ikura ɲana ipulia lâa ara kâ, ande tia. Mine nde mana mana ɲga kinda kawânda uru iporo ɲgua kaɲa rua, a?

### **Ambo tamâta tonɲe ne ilo-kalo nde sondo, ande i ma iveta vetâɲa ara**

<sup>13</sup>Ambo tamâta tonɲe imo miki ɲginimi tava ilo-kalo sondo, ande i ne vetâɲa rârâni ma itula ne ilo-kalo ɲinde pwataki. I ma ipatawa tamwata tini ku ma ipono muli pa vetâɲa ara, itogo i ne ilo-kalo sondo kilala mine. <sup>14</sup>Aɲga tamâta ea uru ipadâda ɲananzi tamâta pinde, aku imo iroto nzâla ɲana ipasuka tamwata tini kâ, ande tamâta mine ma indeka ku iporo tu, “Naneɲgu ilo-kalo nde ara nâ”, mine ndimo. ɲgua kaɲa mine nde ɲgua laɲeɲa nâ. <sup>15</sup>Ilo-kalo kie mine ɲandai iyoka pa samba indue imâ ɲga. ɲinde nde tâno nâ ne ilo-kalo, aku ɲinde nde ilo-kalo potomule lâ Maro Kindeni nao. Sadana nde imo ilo-kalo kie mine warika. <sup>16</sup>Miki kalonɲo ɲga; tamâta ea kinzi uru sipadâda ɲananzi tamâta pinde, aku simo siroto nzâla ɲana sipasuka warakanzi tininzi kâ, ande tamâta ɲinde silaɲa sipole ɲgua tukuɲa, aku uru siveta vetâɲa potomule kie-kie rârâni tona.

<sup>17</sup>Aɲga ilo-kalo ara iyoka pa samba indue imâ, aku ilo-kalo ɲinde nde kie tonɲe. Tamâta ea kinzi sikai ilo-kalo ɲinde, kinzi ɲinde ma siveta vetâɲa sondo lâ Maro Kindeni nao. Kinzi ma simo ilonzi kalonzi taitu

kunzi tininzi pinde, ku ma naonzi mwasa nâ panzi. Kinzi ma sipatawa warakanzi tininzi, ku ma kalonzi sukânga ndo ŋananzi tininzi pinde. Kinzi ma siveta vetânga ara kie-kie, ku ma siveta vetânga kie taituni panzi mbaliŋa warakanzi wa kinzi sugorai tamwatanzi wa. Kinzi nenzi vetânga ma irerege kuku kawanzi ŋgua. <sup>18</sup>Ambo wisi-pisi ne mâsi ma imo ŋgininda, ande ŋinde itogo kinda tapau kaniŋa vâsa lâ tâno ilo. Aku muli, ŋinerŋa vetânga arara kie-kie ma ipânga lâ ŋgininda, itogo kâpwa ara ipânga tâno ilo mine.

**Tamâta ea ipono muli pa tâno ne vetânga, ande  
i imo Maro Kindeni ne kazânga tamâta**

**4** <sup>1</sup>Pambitânga tava pawaja râra uru ipânga lâ miki ŋginimi. Aku ŋinde nde duvi mana, a? Ŋinde miki kasama lâ. Miki uru ilomi kâki ŋana kagona mbaliŋa kie-kie, aku ŋinde iveta paraŋa ipânga lâ ilomi kalomi.

<sup>2</sup>Miki ilomi ŋalae koŋa tu kagona mbaliŋa kie-kie, andeta miki ŋandai kakai ŋga. Mine kala miki uru kapunzi tamâta pâta simâte. Miki ilomi yosi pa mbaliŋa, taitu miki kakai, ande tia. Mine kala miki uru kapawa sakamao ndo wa kaveta paraŋa wa. Miki ŋandai kano pa Maro Kindeni tu ma mbaliŋa ilami ŋga, aku ŋana duvi ŋinde kâ, ande miki kakai mbaliŋa ŋinde tia. <sup>3</sup>Aku lâ zo ŋana miki kakai noŋa pa Maro Kindeni tu i ma mbaliŋa ilami, ande miki kakai tia, ŋana tu nemi ilo-kalo nde soki-soki. Miki ilomi tu kakai mbaliŋa ŋana kandeka ku katambira kaa nâ, aku kalomi kapa ŋana Maro Kindeni kâ.

<sup>4</sup>Miki nde katogo taine tonŋe ipile kaiwa tamâne ku ilâ itambira tini potomule! Miki kaloŋo ŋga; ambo tamâta tonŋe ilo pa tâno ŋine ne vetânga wa kelekele wa, ande ikai kazânga pa Maro Kindeni. Tiambo miki kazizâla ŋana ŋinde kâ, a? Tamâta ea ilo tu iveta mete kuku tâno ŋine ne vetânga, ande i imo Maro Kindeni ne kazânga tamâta. <sup>5</sup>Maro Kindeni kawa ŋgua ikeno lâ pepa tini, aku ŋgua ŋinde itula pwataki tu i io Koroani Sapânga imâ ilonda lâ, aku Maro Kindeni ilo ŋalae tu kinda ma tao ilonda ndo ilâ papa i simbo nâ. Tiambo miki katu ŋgua ŋine nde ŋgua kaa nâ, a? <sup>6</sup>Taitu Maro Kindeni ne wisi-wisi nde imâ ŋalae ndo pa kinda. Mine kala i kawa ŋgua ikeno lâ pepa tini mine tu,

“Tamâta ea kinzi uru sipasuka warakanzi nâ tininzi, ande Maro Kindeni ikai kazânga panzi; aŋga i ne wisi-wisi ikeno panzi tamâta ea uru sipatawa warakanzi tininzi.”

<sup>7</sup>Mine nde ara ŋana miki ma kapatawa warakami tinimi lâ Maro Kindeni nao, aku kapaveta kuku i kawa ŋgua. Ambo miki ma kakai kazânga pa Sadana, ande i ma ipilemi ku ikâwa ilâ. <sup>8</sup>Ambo miki ma kalâ kamo Maro Kindeni tini laiti, ande i kala ma imâ imo ku miki mine nâ. Miki kiesaka tamwatami, ara ŋana miki ma kapaveta kuku vetânga ara



nâ, itogo tamâta ipua mbau ñana ipânga tini mbâra-mbâra kâ. Aku miki tamâta ea kamo tava ilomi kalomi rua-rua nâ, ande ara ñana miki ma kasoki ilo-kalo sakamao ikeno ilomi ñinde piti, ñana ilomi ma ipânga mbâra-mbâra kâ. <sup>9</sup>Ara ñana miki ma kalomi ñgere ñana nemi vetâña soki kâ, aku kalomi sukâña wa ilomi malia wa kata ñalae wa. Miki tamâta ea uru kandeka ñana nemi vetâña soki kâ, ande ara ñana miki ma kapalele ku kamo tava ilomi malia ndo. <sup>10</sup>Ambo miki ma kapatawa warakami tinimi lâ Maro Ñalae nao, ande i ma isuka miki kâki.

#### **Kinda ma tasowe ñgua sakamao ilâ panzi kalo-tawana tamâta ndimo**

<sup>11</sup>Niñgu-nambwe wukale, miki ma kaporo ñgua sakamao ilâ panzi ninda-nambwe kalo-tawana tamâta ndimo. Tamâta ea isowe ñgua sakamao ilâ pa ninambwe kalo-tawana tamâta wa italea i wa, ande ñinde itogo tamâta ñinde italea ku iporo ñgua sakamao pa Maro Kindeni ne tukuña tona. Aku lâ zo ndia noko kutalea tukuña ñinde, ande noko kupu muli papa marumbu lâ, aku kupamorai tu noko nde ñalae kala kupole tukuña. <sup>12</sup>Taitu Maro Kindeni simbo nâ ipulia ñgua tukuña, aku i simbo nâ ma ipare nia panzi tamâta. I simbo nâ ikura ñana iyautenzi tamâta ku via mao ilanzi, aku i simbo nâ ikura ñana izavarunzi kâ. Mine kala noko nde ea kala kutu kutalea ñgua ilâ panzi noko tini pinde, a?

#### **Kinda ma tapasuka warakânda tininda ndimo**

<sup>13</sup>Miki tamâta pinde uru kaporo ñgua mine; “Tiambo ñainani tâku mbwale tâku, ande naña ma ayoka alâ pa lawea tonje, aku ma akai wurâta ñana mbaliña kâ ikura mbwera taitu.” Ayo, noko tamâta ea uru kuporo ñgua kaña mine, ande kuloño ñga; <sup>14</sup>Noko ñandai kusama ñana vetâña ndia ma ipânga lâ mbwale kâ. Noko ne via nde itogo mundo ipânga ku imo zo tini nâ, ñineña walele nâ marumbu ndo, aku nao tia lâ. <sup>15</sup>Mine nde ara ñana noko ma kuporo ñgua kaña mine; “Ambo Maro Ñalae ma isâu pa naña, ande naña ma amo viângu, ku ma aveta wurâta ñinde ilongu tu aveta.” <sup>16</sup>Andeta miki uru kapasuka warakami tinimi. Miki kapandekâna warakami, andeta kalomi kapa ndo ñana Maro Kindeni kâ. Aku vetâña rârâni kie mine nde vetâña sakamao ndo. <sup>17</sup>Miki rârâni taitu-taitu kalomi ñgere sondo ñga; ambo Maro Kindeni itula vetâña ara tonje pa noko tu kuveta, andeta noko ñandai kuveta vetâña ñinde ñga, ande ñinde nde kiesaka.

#### **Ñgua kaika ilâ panzi mbaliña warakanzi**

**5** <sup>1</sup>Kala ñine naña atu aporo ñgua pinde pa miki mbaliña warakami. Malia ñalañala kie-kie nde nao laiti ñana ipânga pami kâ. Mine nde ara ñana miki ma kakai kalo-kalo ku kata ñalae.

<sup>2</sup>Miki nemi mbaliña wa kekelele rârâni nde nao tia lâ, aku nzirika sika nemi lalava arara rârâni marumbu lâ. <sup>3</sup>Miki nemi “gol” wa “silva”

wa, ande take kana lâ. Aku lâ zo ɲana Maro Kindeni ma ipare nia panzi tamâta kâ, ande take kana ɲinde ma itula nemi kiesaka ipâŋga nia yo, aku ma ikana miki karaemi itogo yââ mine. Zo imâ ipâŋga laiti lâ ɲana tâno ɲine ne zo ma marumbu kâ, taitu miki kamo kagona mbaliŋa nâ. <sup>4</sup>Miki kalomi ɲgere sonde ɲga; muŋga, tamâta pinde sikai wurâta pami lâ nemi tâno ilo, andeta miki kakai laŋeja panzi ku katoto nenzi mbumbu pinde. Aku mbumbu ndainani nâ nde isarâwa pa Maro Kindeni tu ma ipare nia pami ɲana nemi vetâja sakamao ɲinde kâ. Aku nemi wurâta tamâta ɲinde nenzi sarawâja kala ipâŋga pa Maro Ɔjalae, i Walo Tamwata, aku iloŋo lâ. <sup>5</sup>Ikura zo râràni miki kamo tâno kulu, ande miki uru kakai mbaliŋa arara kie-kie, kala kamo kandeka nâ. Miki uru kaka kâpwa ɲalae, kala katumbu ɲalaŋala lâ. Mine nde miki katogo ɲgoa itumbu ɲalae, ɲineŋga tamâta sipu pâta imâte. <sup>6</sup>Miki uru kaonzi tamâta arara lâ ɲgua nia, ɲineŋga kapunzi pâta simâte. Andeta kinzi ɲandai miki nemi kazâja tamâta ɲga.

**Ara ɲana kindi ma tatu ilonda keno mwasa ɲana takale malia kâ**

<sup>7</sup>Mine nde niŋgu-nambwe wukale, ara ɲana miki ma katu ilomi keno mwasa ɲana kakale malia kâ, aku kao tinimi pa Maro Ɔjalae ne zo ɲana itaulo imâ kilo kâ. Kalomi ɲgere ɲana ɲine kâ: kindi uru tao tininda ɲana kâpwa ara tu ipâŋga lâ tâno ilo, aku tatu ilonda keno mwasa ku tao tininda pa karâzi tu ma isuka tâno. <sup>8</sup>Aku ara ɲana miki kala ma katu ilomi keno mwasa mine nâ ɲana kakale malia kâ. Aku kamandi kaika nâ, ɲana tu Maro Ɔjalae ne zo ɲana itaulo imâ kilo kâ ande imâ ipâŋga laiti lâ. <sup>9</sup>Niŋgu-nambwe wukale, miki ma wisimi nâna panzi ninda-nambwe kalo-tawana tamâta ku kaporo ɲgua nao-muli panzi, mine ndimo. Tia ma Maro Kindeni io miki lâ i ne ɲgua nia ɲana ipare nia pami. Miki kaloŋo ɲga; tini nâ ɲga Ɔgua-Samâja Tamwata ɲinde ma imâ ipâŋga.

<sup>10</sup>Niŋgu-nambwe wukale, ara ɲana miki ma kalomi ɲgere ɲananzi ɲgua-tulâja tamâta muŋgâja, kinzi ɲinde muŋga situla Maro Ɔjalae kawa ɲgua. Lâ zo ɲinde, nenzi kazâja tamâta uru siveta kenzi sakamao ndo panzi, andeta kinzi situ ilonzi keno mwasa aku sikale malia ɲinde. Ara ɲana miki kala ma kaveta ikura nenzi vetâja mine. <sup>11</sup>Kindi uru taporo ɲgua mine; “Tamâta ea kinzi situ ilonzi keno mwasa ɲana sikale malia kâ, ande kinzi ɲinde sikura ɲana sindeka kâ”. Aku miki kaloŋo Jop parina lâ tu i itu ilo keno mwasa ku ikale malia kie-kie ipâŋga papa i ɲinde. Aku miki kasama tu muli, ande Maro Ɔjalae iveta kie ara ndo pa Jop. Mao nâ, Maro Ɔjalae kalo sukâja ndo pa kindi, aku i nao mwasa nâ pa kindi.

**Kindi ma tasarâwa pa sâ tonje ɲana isuka  
kindi nenda ɲgua pâja, mine ndimo**

<sup>12</sup>Niŋgu-nambwe wukale, nanenju ɲgua ɲine nde ɲalae tina; miki ma kasarâwa pa samba wa tâno wa kekelele tonje ɲana isuka nemi ɲgua

pâŋa, mine ndimo. Ambo miki kapambwâre ŋana kaveta vetâŋa tonŋe, ande ara, kaveta ikura warakami kawami mine. Ambo miki ma kaporo tu, “Naŋa ma aveta vetâŋa ŋinde tia”, ande ara, kaveta ikura warakami kawami mine. Ambo miki ma kasarâwa pa sâ tonŋe tu isuka nemi ŋgua, ande Maro Kindeni ma iomi lâ i ne ŋgua nia.

### **Maro Kindeni uru ipaloŋo pa tamâta ara nenzi noŋa**

<sup>13</sup> Ambo malia ipâŋga pa tamâta tonŋe lâ miki ŋginimi, ande ara ŋana tamâta ŋinde ma ikai noŋa pa Maro Kindeni ŋana isuka i kê. Ambo tamâta tonŋe ilo ndeka, ande ara ŋana i ma iwâŋgi wâŋgiŋa paneâŋa kê pa Maro Kindeni. <sup>14</sup> Ambo tamâta tonŋe lâ miki ŋginimi ikai pukoŋa, ande ara ŋana i ma ipasupwa ilâ panzi kalo-tawana tamâta ŋgu nenzi katonâŋa tu ma simâ kuku. Ŋineŋga kinzi ma sino pa Maro Ŋalae, ku ma sikai i ndamwa ku siyoli samimi lâ pukoŋa tamâta ŋinde tini. <sup>15</sup> Ambo nenzi kalo-tawana ikeno mao pa Maro Kindeni, kala sikai noŋa mine papa i, ande Maro Ŋalae ma izavaru pukoŋa ŋinde piti lâ tamâta ŋinde tini, aku ma tini ara kilo. Ambo tamâta ŋinde muŋga iveta kiesaka, ande Maro Ŋalae ma izavaru kiesaka ŋinde piti lâ i tini tona. <sup>16</sup> Mine nde ara ŋana miki kalo-tawana tamâta taitu-taitu ma kapatula nemi kiesaka pa nawalami, aku kano pa Maro Kindeni tu ma isukami. Ambo miki ma kaveta mine, ande Maro Kindeni ma ivetami tinimi ara kilo. Ambo tamâta tonŋe imo tamâta sondo lâ Maro Kindeni nao, aku ikai noŋa papa, ande Maro Kindeni ma ipaloŋo pa tamâta ŋinde ne noŋa. Kinzi tamâta mine nenzi noŋa ma sikai kanaŋo.

<sup>17</sup> Ŋgua-tulâŋa tamâta muŋgâŋa Ilia, ande i tamâta nâ, itogo kinda mine. Andeta i ino kaika pa Maro Kindeni tu ma isae nzâla pa karâzi ŋana indue imâ tia kê. Ŋineŋga karâzi imbe indue tâno kulu tia ndo lee, ikura mbwera ŋato aŋga nzimona lima kanaŋo taitu lâ. <sup>18</sup> Aku muli, ŋineŋga ikai noŋa kilo, aku karâzi imbe indue, kala kâpwa ipâŋga tâno ilo kilo.

### **Ambo tamâta tonŋe iveta kiesaka, ande ara ŋana kinda ma takai i taulo pa nzâla ara kilo**

<sup>19</sup> Niŋgu-nambwe wukale, ambo tamâta tonŋe lâ miki ŋginimi ipu muli pa Maro Kindeni ne ŋgua mao ku ilâ iveta kiesaka, ŋineŋga i ninambwe tonŋe ikai i taulo imâ pa nzâla ara kilo, ande ninambwe ŋinde iveta kie ara ndo papa i. <sup>20</sup> Miki kalomi ŋgere sondo ŋana ŋine kê; ambo tamâta tonŋe itu ipono muli pa kiesaka, andeta ninambwe tonŋe isuka i ŋana ipile nzâla sakamao ŋinde, kala itaulo imâ pa Maro Kindeni kilo, ande ŋinde itogo i ninambwe ŋinde ikai tamâta ŋinde piti lâ nzâla ŋinde ilâ pa mateŋa kê. Aku Maro Kindeni ma izavaru i ne kiesaka piti lâ i tini tona.